

漢魏六朝唐代志墓金石例



中華書局

漢魏六朝唐代志墓金石例

吳鎬撰

叢書集成初編

漢魏六朝唐代志墓金石例

中華書局出版發行

(北京王府井大街三十六號)

秦皇島市資料印刷廠印刷
一九八五年北京新一版

開本：七八七乘一〇九二毫米三十二分之一
統一書號：一七〇一八·一五一

漢魏六朝唐代志墓金石例

此據後知不足齋叢
書本排印初編各叢
書僅有此本

漢魏六朝志墓金石例自序

余年二十有一，購得宋寶王校錄書冊數帙，內有金石例凡三種。此係雍正年鈔本，在雅雨堂未刊之前。在時好爲詩詞及駢體，未暇討論也。後稍稍究心碑碣文字，每以此三書參考。因曝書亭集跋墓銘舉例之言，輒思補爲之，以廣前人所未及。適吾鄉彭甘亭先生見語，以爲此數年來與諸相知欲爲而未果者，子盡任之，固不揣鄙陋，皆此數十頁所舉碑例，限於插架，儲本無多，或詳密未備，舛錯挂漏，均所不免。惟大雅君子有以匡之焉。嘉慶壬申，辭司命日，荆石田民吳鎬書。

漢魏六朝唐代志墓金石例

漢魏六朝志墓金石例卷一

清 鎮洋吳 鎬荆石撰

漢

蔡中郎。碑二十四首。靈表二首。

太尉橋公廟碑。

右碑書祖父官秩。書高祖諱。不書祖父諱。一例也。詳書治行。一例也。末出諱字。復總敘履歷。一例也。按橋公一人而二碑。此其三。孤故臣門人所立。文云書於碑陰者。後故吏司徒崔烈等所立。是正碑矣。碑陰而系以銘。又一例也。

太尉橋公碑。

右碑首書諱字鄧邑。不書姓名門也。一例也。祖父書書官。不書諱。又一例也。

太傅文恭侯胡公碑。

右碑不敘家世。僅書其父之官。一例也。書賜諡。一例也。書故吏名。因碑爲所立。又一例也。此一人

而建三碑。非書於碑陰者。下文列侯楊公碑同。

太傅胡公碑。

右碑首書卒葬日。一例也。卽書椽某某稱公之德。云云刊石慰哀。一例也。總計其五作卿士七蹈相位。又一例也。

胡公碑。

右碑書其繼親在堂。朝夕定省。不違子道。一例也。卒後書天子悼痛。贈策賜諡。又一例也。

太尉汝南李公碑。

右碑書族出及曾祖父伯父官。因顯也。一例也。書母憂乞行服闋。一例也。卒不書月日。略也。

太尉楊公碑。

右碑書烈祖楊喜封赤泉侯。嗣子業紱冕相繼。公之丕攷。登司徒太尉。獨不書諱。一例也。

司空文烈侯楊公碑。

右碑書本人及其父祖之官。皆不書諱。變例也。書其孫某昭銘景烈。一例也。

文烈侯楊公碑。

右碑不書家世履歷及卒葬日。亦變例也。

司空袁逢碑。

右碑亦不書姓諱家世鄉邑。似史臣論讚變例也。司空房公碑同。

荊州刺史度侯碑。

右碑與袁房二碑相似。而此則序而不銘。一例也。

朱公叔墳前石碑。

右碑首書年月日某官某卒於京師。一例也。序中但詳其子受顧命。不崇墳封墓。而懼彌久。等於平壤。乃刊碑石。一例也。銘中始論讚公叔。又一例也。碑題書字不書官。一例也。

陳留太守胡公碑。

右碑正例書也。書其卒日遣吏奉章報謝。蓋遺表也。一例也。

陳太丘碑。

右碑題書所宰邑名。一例也。書懸車告老。一例也。書會葬千人。一例也。

文範先生陳仲弓碑。

右碑題不書官。證重於官。一例也。攷後漢書列傳。仲弓有六子。紀譔最賢。廟碑所載。季方早亡。紀字元方。長子也。廟碑止書二子。此碑但書孤嗣。紀餘子悉不書。又一例也。按王止仲墓銘舉例。以

韓昌黎柳子厚誌書子不書妻。謂子蓋微出。其下書子不書妻者。悉以此誌例之。今考東漢志墓碑文。書子書孫者有數十篇。書妻者僅見六篇。一李子才碑。書出妻。未再娶。因無子。故書之。一馬江碑。蓋因妻卜兆。與江共塋。故書之。一侯成碑。妻先卒而合葬者。然於尾後提行另書。餘則夏堪碑。有聘會謝氏并靈合柩句。戚伯著碑。有聘妻朱氏句。洪氏所謂文則崛奇。字甚怪陋。蓋不足據爲例者。又有金恭殘碑。妻缺往缺字樣。又皆不書子。此外則無之矣。可見古之金石楷式。無妻子兼書之例。卽以韓文論之。凡書子不書妻者。除其所舉之外。尙有五篇。止仲又豈得皆證爲微出。此言之不足據者。復以李文公獨孤墓誌。柳河東裴君墓誌。以實其言。則近於自文其過矣。

郭有道林宗碑。

右碑正例書也。但書族出一例也。

貞節先生范史雲碑。

右碑書遠祖不書三代。一例也。碑題書諡不書官。同文範先生陳仲弓碑例也。

彭城姜伯淮碑。

右碑書高祖祖皆豫章守而不書父。因顯也。卽例之變也。文中敘從游弟子某等。因碑爲所立。一例也。碑題書其鄉郡名。又一例也。

翟先生碑。

右碑與袁逢碑同。書鄉黨勒銘。一例也。

汝南周巨勝碑。

右碑題不書職。蓋未就也。一例也。姓敘於銘中。又一例也。

處士園叔則碑。

右碑首書漢二十有一世處士有某者。一例也。書其臨沒顧命曰。知我者其蔡邕。乃爲銘。一例也。碑

題書處士。亦一例也。

元文先生李子才碑。

右碑書出妻後未娶。故無子。一例也。私諡見於銘中。一例也。

袁滿來墓碑。

右碑不曰諱某字某。但云茂德休行。曰袁滿來。志童子。一例也。題書墓碑。一例也。

童幼胡根碑。

右碑書某官某子。某字某。又誌童幼。一例也。書就封祖墓。一例也。親屬樹碑。又一例也。

太傅胡公夫人靈表。

右表題不書氏一例也。題書靈表一例也。書字不書諱一例也。書所生五子未冠者二。不書名一例也。書元女金盈鑄銘頌母又一例也。

司徒袁公夫人馬氏靈表。

右表書族出正例也。書弟因顯也。一例也。不書字諱。婦人重在姓。或略之一例也。書子二。而銘曰兄弟何依。姊妹何親。女蓋略而不書。又一例也。

諸葛丞相墓碑一首。

司馬季主碑。

右碑係銘辭。不載鄉族姓諱。文止四言八句。例之變也。按晉張華博物志。漢西都時。南宮寢殿有醇儒王史威長死葬銘。八句三十二字。蓋當時有此碑式。惟彼則以王史威長四字作末句。與此稍異。又按真誥稽神樞第四篇。載司馬季主墓。在蜀成都升盤山之左。諸葛武侯昔建碑銘德於季主墓前。碑讚末曰云云。即四言八句。據此考之。蓋上文殘缺。非全碑矣。然真誥一書。真偽難辯。未可舉論金石文字也。

邯鄲淳碑二首。

鴻臚陳君碑。

右碑云存乎本傳。故略舉其著於人事者一例也。書父與弟。因時有三君之號也。一例也。書子建碑。與蔡中郎文烈侯碑同例也。

曹娥碑

右碑止載曹盱及娥之死。讚嘆之語。悉詳於誄辭。一例也。

不著撰人姓諱。

碑四十首。

表紀一首。

墓表一首。

碣一首。

銘一首。

郎中鄭固碑

右碑詳其文義。乃弟述其兄而作。故不書姓。一例也。文云大男孟子。七歲而夭。配食斯壇。蓋祔葬者。一例也。

泰山都尉孔宙碑

右碑正例書也。碑陰書未冠者曰門童。一式也。

按洪氏曰。親受業者曰弟子。次相傳授者曰門生。未冠者曰門童。總而稱之。亦曰門生。椽屬曰故吏。古籍曰故民。非吏非民。則曰處士。素非所泣。則曰義士。義民。亦有稱議民。賤民者。附誌於此。又洪氏曰。凡漢刊。其首行卽入詞。無額者。或題其前。如張納樊安之比。亦甚少。已篆其上。復標其端。惟此碑耳。此式後來多遵用。并附誌之。

執金吾丞武君碑。

右碑不書姓。鉅族也。書其父兄於卒日之後。一例也。書其父之官而不名。與蔡中郎文恭侯胡公碑同例也。書兄之官而亦不名。又一例也。

衛尉卿衛府君碑。

右碑辭末有門生朱登名。或卽其所撰。書父兄之官而不名。與前碑同例也。

郎中郭君碑。

右碑殘缺。洪氏所謂其云惠兄仲犀。又云元兄繼世。而有爲人後者爲之子之句。蓋郭君以兄子爲後也。一例也。

沛相楊君碑。

右碑辭中書姓。與蔡中郎周巨勝碑同例也。

太尉楊震碑。

右碑係震之孫門人所立。去震卒已四十餘年矣。書四子一孫名及宮秩。一例也。

司隸校尉忠惠父魯君碑。

右碑不書姓名門也。書其喪父如禮。蓋服闋而拜官者。一例也。碑題書門人私諡。一例也。

豫州從事尹宙碑。

右碑書君東平相之元。會稽太守之曾。稱曾元而去孫字。一變例也。

高陽令楊君碑。

右碑書楊著曾遷拜思善侯相。卽以兄愛去官。碑題仍稱高陽令。蓋古金石體式如此。一例也。

博陵太守孔君碑。

右碑書彪從博陵遷下邳相河東太守。而題書前官。蓋碑爲博陵故吏所建。亦古金石之一例也。

元儒先生婁壽碑。

右碑書私謚於碑題。而文中但云論德處謚。不出元儒二字。變例也。

堂邑令費鳳碑。

右碑乃其妻弟所立。略敘年月卒日。而卽系以誄辭。古人誄與碑誌同。如曹娥碑亦曰設祭誄之一例也。誄後載故吏二人竭力送終之事。亦一例也。

堂邑令費鳳別碑。

右碑首云舅家仲孫甘陵石勛。歐陽集古錄作勛字子才。蓋鳳之中表所述。一例也。序止自言奔喪哀慕。敘詩

之意。僅八十一字。卽系以詩。先敘世系歷官。繼以韻語六十句。一變例也。文中書甥舅及諸姑伯

姊皆親例也。書其孫之字。又一例也。

敦煌長史武斑碑。

右碑云追惟昔日同歲郎署。蓋爲僚友立者。一例也。碑末載書碑人姓名。一例也。

平都相蔣君碑。

右碑書卒於官。一例也。蔣卒於元嘉二年。文云禮畢祥除瞻望墳塋。則碑乃服闋後所立也。

山陽太守祝陸後碑。

右碑首書故吏王堂等述。云云。一例也。陸卒之後。已樹碑銘功矣。此則三年禮闋之後。故吏復爲刊

石者。故題曰後碑。亦一例也。下陳球後碑同。

從事武梁碑。

右碑不書鄉邑族出。略也。書建祠雕文。一例也。書子曰孝子某。一例也。孫曰孝孫某。又一例也。

議郎元賓碑。

右碑書缺守之弟子。中牟令兄子。書其伯叔之官而不名。又一例也。

車騎將軍馮緄碑。

右碑書賜諡曰桓。見於銘末。一例也。緄謫遷廷尉而終。題則仍書將軍。亦一例也。

金鄉長侯成碑

右碑敘賜氏之始。例之正也。碑尾提行另書夫人以某年月日遭疾終。蓋先卒而合葬者。又古今石文字之一例也。不書夫人姓。略也。

郎中馬江碑

右碑書夫人曹氏。於某年月卒。後江卒。相去十七年矣。又載其弟位至主簿督郵。年三十二。早世。蓋洪氏所云當是因夫人卜兆。以馬君共塋。又同時改厝其弟。故碑并言之。變例也。

愼令劉修碑

右碑因宗室不書氏族。一例也。碑爲二弟三子所立。又一例也。

北軍中侯郭仲奇碑

右碑首書仲奇爲元城君之第四子。後敘家世。并書其兄弟官。一例也。

故民吳仲山碑

右碑專書尙志惠施之德。一正例也。不書諱而書字。一例也。碑題書故民。洪氏謂物故之民。作碑者體其謙晦之操。故以民稱之。與州縣之民爲其長官立碑。自稱故民者不同。亦一例也。文則稱吳公。又一例也。

童子逢盛碑。

右碑乃其父之門人所立。盛年十二而夭。碑題書童子一例也。

綏民校尉熊君碑。

右碑書其同產弟某。係某官。早卒。一例也。碑後載茶陵長文春重安侯相杜輝二人官壽行事。各

數十言。洪氏謂似是同郡盛德之士。作文者惜其無所紀錄。故附之左方。則柳河東先友記。王臨

川征君墓表。皆宗此例也。

梁相費汎碑。

右碑書適孫某。因碑爲所建。一例也。書其二子名并官秩。與楊震碑同例也。

光祿勳劉耀碑。

右碑云孝文枝胄。梁孝河東之裔孫。誌宗室之一例也。

督郵斑碑。

右碑書司吾君少子。尚書小弟。銘曰仲夏賈霜。蓋早夭者。銘之首句書字。一例也。

浚儀令衡立碑。

右碑辭曰於穆從事。蓋其官名。銘首書官。一例也。碑云其先出自伊尹。衡方碑亦云伊尹稱阿衡。因